

四庫全書

集部

欽定四庫全書

集部

金文靖集卷五

六

詳校官編修臣裴謙

中書臣劉源溥覆勘

總校官進士臣朱鈐

校對官中書臣楊世倫

謄錄監生臣史步雲

欽定四庫全書

金文靖集卷五

明 金幼孜 撰

五言絕句

早朝寫懷

宵分睡正濃忽聞雞喔喔
強起整衣冠明星在屋角

風雨入朝

長衢浩漫漫水深泥沒膝
京城五六月強半風雨日

東閣自況

太平幸無事長日文書靜素飡誠所愧聊足慰衰病

自歎 四首

齒疎髮將盡力衰膝已酸身弱衣不勝腰窄帶逾寬
不謂老已至情思日衰落寡諧性所安庶以存吾樸
昔賢以文名我自愧作者古道不可復誰謂知音寡
悅世非所尚直道將自任掛冠倘可期庶以遂初心

偶成 二首

侵尋老易至荏苒歲如馳萬事如雲變浮名空爾爲
逢人懶勸酒送客倦吟詩朝退無餘事閒消幾局碁

即事

五月西湖上荷花開正濃花開能幾日又見摘蓮蓬
我愛梧桐樹枝濃露不晞秋聲一夜至葉葉逐風飛
七夕寫懷

懶性拙尤甚掛冠當早休滿懷清似水涼月一天秋
偶興

踈雨過梧桐商飈動楊柳秋意已颯然殘暑詎能久

觀葵花

蜀葵生庭間甚為人所惜昨日始開花今朝已岑寂

張古老騎牛圖

客有騎牛者人稱古老仙問知欲何往大笑指青天

布帳梅花

踈竹間纖梅清標絕點埃微風動虛幌似有暗香來

題萬竿烟雨圖贈康知事

萬玉碧毵烟深雨氣涵鷓鴣啼日暮客思滿江南

題墨梅贈楊稷

素質比瑤瑰貞心不易摧江南春信早先寄一枝來

題墨竹寄趙君公復

四首

猗猗綠如簣飄拂青雲端炎光不到地颯颯江風寒
瀟灑渭川上數竿淨如許秋思滿江南寒烟淡疎雨
幽貞不可變歲久色逾好夫君渺湘南冰霜慎自保
新梢出林表可擬青琅玕應知晚節至結實待鳳鸞

子昂蘭石

深谷發幽姿自與衆草別蒼石動玄雲清風洒晴雪

子昂竹石

翡翠臨風好珊瑚出海清江南春事晚暮雨鷓鴣聲

為庶吉士萬完題竹

翠黛濕簷簷懸厓百尺長誰知玉堂夜聽雨憶瀟湘

牧牛圖為師尚書題

日出騎牛去日暮逐牛歸年豐耕作好食飽望牛肥

題莫慶善鷹為表生大鶚賦

昔年從羽獵高入萬重雲尚有冲霄志難忘報主恩

題墨竹贈貢士鄒觀

五首

虛心秉高潔不受一塵侵五月清溪上蕭蕭風滿林
挺挺瀟湘玉平生意獨耽玉堂風雨夜思爾隔江南
雲谷翠森森冰霜閱歲深已看能鳳舞還聽作龍吟
夜雨翻龍箨春風長鳳梢佇看清廟薦美韻協笙匏
逸態謝炎涼貞姿炯冰玉君子思切磋無忘詠淇澳

六言絕句

新秋偶興 二首

楊柳幾行疎翠梧桐一葉飄秋陰蛩偏響北戶早鴈正
度南樓

過雨漸消殘暑迴颿初送早涼捲簾獨對芳樹拂席時
焚好香

七言絕句

元夕午門觀燈應制 十二首

雲擁蓬萊五色濃
銀燈煜煜照芙蓉
笙歌一派來天上
萬歲聲中拜六龍

龍山結綵翠重重
萬壑千巖錦繡中
報道羣仙來獻壽
驂鸞駕鶴下瑤空

午夜天香散紫臺
東風玉樹萬花開
千官齊拜瞻龍袞
丹陛前頭進壽盃

御前百戲許都陳
燈市繁華五夜春
綵隊行行分次第
一回歌舞一回新

天際三山海上移
午門雪霽彩雲垂
侍臣朝罷親承旨
今夜元宵許進詩

月滿天門集珮珂
華筵此夜受恩多
教坊樂譜皆新調
絕勝梨園第一歌

蠟炬高燒映紫宸
踏歌初進鼓聲頻
年年正月元宵節
願作蓬萊獻壽人

上元十日盡休衙
絃管東風帝子家
闕下放燈如白日
人來人往自諼譁

海宇豐年協瑞徵
農歌社舞賀昇平
自慙忝預傳柑宴
未有涓埃答聖明

天階雪後淨氛埃
月上龍樓寶仗開
盡道聖恩深似海
觀燈都向午門來

戲樂呈來六隊中
御前特勅賜黃封
侍臣既醉猶能賦
步出端門月正中

閭闔重重夜不扃
瓊樓十二敞銀屏
東風一曲昇平樂
此夜都人盡許聽

爲吏部師尚書題畫 六首

碧戶幽窓盡日閒
落花啼鳥自間關
白雲野水生春浦

翠黛夫容對曉山
右春景

水滿西湖長芰荷
白鷗汎汎浴輕波
屋頭楊柳深深碧

門外青山苒苒多
右夏景

天際涼風瀑布流
遙峰積翠雨初收
板橋人渡踈林晚

野寺蟬鳴落葉秋
右秋景

曲曲溪流凍不聲
扁舟獨載更多情
千峰玉樹凌寒色

九疊銀屏照晚晴

右冬景

養就丹砂雪作團終朝俛啄近琅玕三山碧海休歸去

好向瑤池弄羽翰

右竹鶴

素質玄文錦翼齊絳桃花下見雙栖可堪野鶴同標格

難與山雞共品題

右白鷗

秋浦晚罾圖

蕭蕭落木水增波
欹岸風冷起棹歌
怪得漁郎羸笑語
晚來罾上得魚多

蘆汀夜笛圖

上下天光接水光滿汀蘆葉晚蒼蒼一聲長笛驚殘夢
明月滿船風露涼

贈孔止武橫州學正

妙年學禮獨超羣早領鄉書會縉紳喜見姓名登乙榜
十年不負讀書勤

承恩曉出五雲端為向橫州作教官聖主崇儒資教育
逢人休歎座氈寒

御溝新漲雨初晴
楊柳毵毵嚙早鶯
朝罷都門一相送
故鄉回首不勝情

便道還鄉兩月程
綵衣偏勝錦衣榮
到家且慰雙親望
膝下頻將壽酒傾

驪駒早發向橫州
遠道風烟莫滯留
五嶺秋來有回鴈
平安先寄鳳池頭

爲馬通政題畫 二首

海棠花發過春寒
花上禽啼宿雨乾
雙雙不惜頭俱白

猶向東風弄羽翰

誰教寒皋語自圓
可人毛羽更新鮮
上林千樹堪栖息
應見高飛近日邊

寫懷十首錄寄諸兄弟

忽忽離家十五年
每懷桑梓獨潛然
東風寒食南源路
洒飯空令憶墓田

南北驅馳鬢已皤
西江萬里隔烟波
池頭舊種黃柑樹
結實秋來有幾多

慈親日夜係深思夢裏常懷見面遲
近得好音相慰藉
為言强健勝前時

先公遺德在江鄉死後人傳姓字香
聖主恩深推錫命
千年黃壤有輝光

伯氏行年五十強年年旅食客他鄉
別來十載知無恙
姜被何時共客床

諸弟持家力有餘田園生計未應踈
堂中奉母多餘暇
好共諸郎更讀書

憶昨窮經慕昔賢
歲寒冰雪伴青氈
一從天上登科後
無復篝燈事簡編

遶屋青山綠樹稠
春來啼鳥自啁啾
回來登覽知何似
幾度臨風慨昔遊

久別親朋覺已疎
頻年不得半行書
平生經術慙無補
空有虛名在石渠

老我于今幸有孫
前人積德至今存
餘生倘遂歸田計
教育猶思淑後昆

寄友人郭房陵二首

京華別後頻相憶尚想風流似昔年前日
德州曾借問尋君不見思悽然

數從馬首問平安遠道懷人有萬端
白首鯨川歸未得誰知為客獨艱難

題畫牛

服箱力穡不知年報主多情祇自憐
好是野田春種後飽肥芳草卧深烟

牧童原上催歸急
遠樹微茫帶夕曛
前日東郊曾扈從
野人牽進沐恩頻

為大理寺丞馬麟題畫馬二首

萬里曾思度玉門
歸來立仗卸橐鞬
飽肥苜蓿風霜晚
未老猶思報主恩

異種由來產渥洼
曾看入貢度流沙
幾迴牽向瑤池過
新濯龍文照五花

山水圖

憶過彭蠡看廬山九疊雲屏倚翠鬟今日看圖山更好
似聞飛瀑落雲間

寒梅凍雀

繁蕊初開滿玉條碧梢低亞影蕭蕭天寒凍雀雙棲穩
却怪朝來雪未消

枯荷鵲鴿

林塘秋盡水波寒荷葉無聲半已殘日暮鵲鴿棲不起
藕花深處露漙漙

生菜為神樂觀道者作

手種青蔬不用鋤
白雲為圃自芬敷
南郊夜宿邀同飯
却憶清齋味有餘

白蓮為樂舞生賦

秋水清涵白玉盤
露華淨洗鏡光寒
幾迴欲載吹簫侶
共向瑤池月下看

雜畫為師尚書遠賦

五首

脩翎如雪自飄飄
飲啄尋常不受招
野濶天高秋萬里

長鳴直欲上青霄

右雙清松鶴

扶桑浴日夢初醒
天上曾聞送好聲
却愛羽毛成五色
梅花照影雪初晴

右梅雪金雞

雪滿瓊林凍不開
數竿如玉立崔嵬
閉門盡日無人到
山鵲一隻飛下來

右竹雪山鵲

駢騶腰褭並傳聞
牝牡驪黃竟莫分
聖代只今多入貢
大宛龍種動成羣

右牧馬圖

絳桃枝上雨初晴
相喚相呼更有情
上林千樹花如錦

欽定四庫全書

金文靖集
卷五

十三

好向朝陽雜鳳聲

右聚禽圖

題趙仲穆馬

房星夜墮渥洼中一片玄雲覆玉驄
遠人知是真龍種萬里牽來獻九重

題王熙臨宣和雪天蘆雁

卷末有端本圖書

端本堂中迹已空興亡總在畫圖中
惟有幹難河上路年年飛雪送歸鴻

題郭魚臺古圖小景

二首

仙館清虛似廣寒
碧紗低卷映琅玕
天風半夜吹殘夢
自把瓊簫度紫鸞

銀河露下散微涼
畫扇金屏度好香
蒼雪萬竿清透骨
卧聽仙樂過瀟湘

題方尚書賓山水圖

浩蕩湖山天際來
雲屏九疊立崔嵬
花邊小艇緣溪水
洞口茅亭倚樹開

凱旋詩 十二首有序

欽定四庫全書

金文靖集
卷五

十三

臣聞帝王之有天下莫不以討不庭安中國為務故
昔虞舜在位有三苗之征周宣中興有獫狁之逐夫
豈聖人之所得已哉不過為生民造福為國家開太
平之業耳洪惟我聖朝太祖高皇帝混一區宇汎掃
穹廬太宗文皇帝復親征強敵肅清沙漠恭惟皇上
以神武之姿紹承祖烈夙夜孜孜惟圖安緝生民乃
於宣德三年秋九月農事之隙親馭六師巡歷邊陲
蓋欲訓飭將士嚴安邊禦侮之備也而邊隅未靖適

率衆南侵皇上遂一舉而滅之曾未逾月塵氛蕩滌
邊境清寧豐功駿烈巍巍煌煌照耀天地所以造生
民無窮之福開國家萬年之業者至矣雖虞舜周宣
之烈何以過哉臣使回至寧州伏覩班師詔下無任
欣抃愧不獲親奉鑒與目擊盛事途次用撰詩十二
首以備紀述謹於復命之日俯伏闕下以獻乞賜聖
覽不勝幸甚

聖主承天統萬方梯山航海盡來王不應殘醜猶烏合

屢犯邊疆恣奪攘

天威赫怒整彤弧萬騎如雲從乘輿白日風雷嚴號令
指揮掌握仗神謨

斧鉞煌煌出九天旌旗千里照山川桓桓武士排山岳
爭道從龍近日邊

昨夜旄頭闇不明忽傳強敵向南行三千鐵騎爭追逐
盡卷穹廬入塞城

金鼓喧闐盡日聞歡聲雷動及軍門六師斬馘知無算

駝馬驅來動百羣

聖皇除暴在安民神武由來合至仁
納款綏降寬大罰
盡令生育在陽春

鐵騎長驅蹴塞雲掃清沙漠蕩塵氛
從今邊籞無烽燧
聖武神功荷至尊

凱奏歡呼入帝鄉天戈一指靖遐荒
臣民快覩平邊詔
萬歲聲中祝聖皇

周宣北伐中興時紀述于今尚有詩
此日時巡因閱武

盡殲羣寇鎮邊陲

絕塞蕭條迹已空
霆轟電掃大荒中
磨厓須勒燕然石

萬世神功繼太宗

萬乘巡邊奏凱旋
千官齊賀九重天
河清海晏昇平日

一統華夷萬萬年

寰宇清平樂世康
雨暘時順歲豐穰
皇圖久遠同天地

宗社尊安聖壽昌

萬竿烟雨圖為袁生大鶚題

滿林烟雨曉濛濛
萬箇琅玕半淡濃
向晚江風吹不散
無端飛翠入簾櫳

秋江待渡圖為席咸寧賦

秋山疊疊暎雲蘿
渺渺長空接遠波
日暮小舟爭渡急
行人猶唱竹枝歌

萬松圖題寄幼學賢弟二首

一別鄉園廿四春
種來松樹已成村
寄言孫子須培植
剪伐無令及本根

種得長松萬箇多連山數里暗烟蘿何時投老歸鄉曲
分我寒巖翠一坡

立春日朝罷偶賦 三首

東郊擊鼓送春回闕下趨朝玉漏催
歲歲黃柑傳臘酒
千官先進萬年盃

春盤春酒開春宴幾得簪花侍御筵
聖主只今恩似海
人人齊賀太平年

隔歲立春先十日東風已覺到天涯
釵頭綵勝替來好

莫笑酡顏鬢已華

題墨梅

姑射仙人不可招
月明瑤圃路迢迢
夢回猶憶西湖上
雪樹參差暗野橋

題墨竹為鄭誠御史作

虛心勁節倚雲端
白日清風散羽翰
幾度趨朝聞鳳管
月明猶想珮珊珊

朝回獨坐憶幼男武安三首

每日朝回對板扉一回相憶一回悲
階前獨步尋行迹
猶想牽衣似昔時

語咲常時近我傍為寬懷
抱解愁腸每從膝下供茶果
時向燈前勸酒觴

秀目寬眉骨格高短衫窄袖小絨絛
階前恁地趨蹌好
來往人稱是鳳毛

晚出長安門偶成

白髮毵毵老從官
簾輿自便懶登鞍
京華久住交游少

惟有西山耐久看

內閣花臺新成口號

聖恩特許築花臺移得名花取次栽
大是眼前生意好便湏酌酒趣花開

徐仲敬作雪梅見貽因題其上

老氣崢嶸宇宙前
開花萬朶照晴天
平生自是調羹手
老大空餘雪滿顛

古松圖

十畝繁陰欲蔽空當時曾受大夫封
廟廊政爾需梁棟
未許終容大壑中

望晴

日晏雲開欲放晴忽聞乾鵲樹間鳴
屢占簷溜停餘滴
且向閒階散悶行

墨蒲萄

風架引藤高十丈翠葉陰陰氣蕭爽
老龍昨夜挾風雨
亂吐驪珠落天上

聞孔君志仁至喜而賦此

與君睽違三載強忽聞遠來喜莫當朝回夜靜卜燈花
為解懷抱愁都忘

文與可墨竹

濃翠森森滿畫屏鳳毛如織長初成月明繞屋驚飈動
彷彿蛟龍作雨聲

候志仁不至

五月傳聞出鳳城相思日日計行程恠來數日無消息

不見簷頭喜鵲聲

為宋給事題四景

江上春山翠作堆
江頭春水綠如苔
何人擁騎東風裏
谷口看花只獨來

春景

青山幾疊護雲屏
綠樹風涼鳥自鳴
最是幽人無一事
捲簾獨坐看黃庭

夏景

涼雲鴈叫荻花秋
兩岸青山帶淺流
向晚月明天似水
吹簫獨上木蘭舟

秋景

萬里平鋪雪滿天
瑤花亂點散瓊田
江村盡日無啼鳥
惟見沙頭繫釣船
冬景

為蕭迪中題扇竹

高節凌雲不可攀
風前時聽珮珊珊
閒將玉管吹明月
人在瀟湘猶未還

和朱仲良先生韻贈彭友恭

二首

六月揚帆別帝京
思鄉日日算歸程
我家兄弟如相問
煩道平安寄好聲

遠來京國訪難兄
繾綣難忘手足情
無奈客居留未久
整裝又出鳳凰城

送武安同福安樞歸西江二首

望斷天涯去不還
空餘血淚染衣殷
西江萬里歸遺骨
烟水漫漫渺故山

天地無情白日悲
臨歧相送忍相違
江南草綠蘼蕪怨
腸斷東風哭子時

為戴容安題扇竹

三逕清陰生畫寒滿林新長碧琅玕何時截作參差玉
吹向瑤臺聽紫鸞

題畫扇寫金陵送別

楊柳深深暎畫樓君行又上木蘭舟夜深正好看明月
莫放青山過石頭

為蕭迪寬題息齋竹

亭亭玉節映琅玕歲晏相看有二難何日相從攜鳳管
夜深吹月向雲端

為葉仲疇題蘭竹二首

綠葉歲疑間紫莖幽芳澹浥露華清美人遙隔湘江外
解珮何當寄遠情

自是芳姿不浣塵西風涼露散清芬莫嫌空谷無人到
歲晏相看有此君

題王母蟠桃

西來王母載河車羽蓋翩翩映紫霞
燕罷瑤池春似海東風開遍碧桃花

題胡太守五馬圖

逸氣騰空不可羈
幾迴聯步上天墀
東風二月棠陰合
夾道爭迎五馬歸

為兄貴質題鵲鵲圖

憶昨離家忽四年
客居長誦鵲鵲篇
相看無奈離情苦
歲晏梅華雪滿天

贈人之官通判

滿城烟雨落花深
離思紛紛惱客心
向曉玉堂揩病目

送行謾復寫新吟

題徐崇威所藏貴妃上馬圖

道前寶扇擁花驄當日君恩第一濃
不是華清事遊幸
後人那得見嬌容

雲林書屋為蕭深州賦

一逕深深長綠陰
雲山高下樹幽森
閉門盡日無人到
時有書聲出遠林

劉商觀奕圖為曾景武賦

一局忘言意若何
古松流水白雲多
回看石室山前路
肯信樵夫有爛柯

題竺上人卷

閒雲流水意悠然
上谷彌陀別有天
欲識禪心清淨處
一輪明月照窓前

庚戌臘月十四夕寫懷

末學深慙忝禁林
空餘白髮伴丹心
平生事業知無補
坐對青燈感慨深

立春賜宴拜和御製

海宇春回瑞景遲年豐民物樂熙熙彤庭錫宴皆霑醉
千載君臣慶會時

恭和御製詩有序

宣德五年秋九月丁未節屆重九伏蒙皇上頒賜羣
臣御製詩一首既又命光祿賜宴于史館咸俾霑醉
以盡君臣同樂之意思至渥也臣竊惟皇上自蒞阼
以來四方寧謐雨暘時叙年穀阜成德化覃被蠻夷

順服朝覲會同一統無外蓋所謂全盛之日也所以
然者皆由皇上恭儉勤勞所致而聖心謙抑恒不自
居往往推之於臣下復乃親御宸翰形之篇什雲漢
昭回日星璀璨誠可謂千載之榮遇者矣臣叨沐鴻
恩輒不自揣爰效古昔君臣賡歌之意謹依韻拜和
以進詩曰

熙熙海宇被仁風民物謳歌樂歲豐聖主優賢隆眷遇
愚臣何幸重遭逢

恭和御製喜雨詩有序

宣德六年辛亥春時當農種雨澤未決乃三月四日
忽陰雲晝翳逮暮微雨霖霖至夜迄旦沛然不已自
近郊以及畿甸之外莫不霑足皇上敬天之澤樂甘
雨之及時喜豐年之有望乃賦喜雨之詩以領示臣
工且出上尊內膳錫宴史館以同樂之恩榮之厚難
以比倫臣仰惟皇上以至仁大德撫馭華夷宵旰孜
孜惟在於愛養斯民自臨御以來天心昭答屢降豐

年海內晏安同臻熙皞斯實由皇上敬天勤民所致
誠天下國家生民無窮之福臣伏覩聖製倍切欣抃
謹依韻拜和以進伏乞睿覽

雨順風調屢歲豐民安物阜萬方同吾皇聖德躬勤儉
感格天心協至公

題竹

翠拂琅玕落粉香無端春色滿瀟湘美人學得青鸞曲
何處吹簫聽鳳凰

為孔守忠題馬

曾觀天閑八尺龍
驍騰萬里振長風
只今圖畫看神駿
無復承恩侍九重

題扇畫

數聲黃鳥綠陰稠
一片青山翠欲流
坐久不知花落去
閒身只為白雲留

題子昂馬為趙君公復作

太液初晴雪正融
金羈新試渥洼驄
幾迴天上從鑾馭

牽度長楊立晚風

題墨菊

自是芳姿不浣塵
曉粧如洗露華新
玉英粲粲黃金色
斜倚東籬日又曛

金文靖集卷五

欽定四庫全書

金文靖集卷六

明 金幼孜 撰

賦贊頌

皇都大一統賦有序

洪惟天朝太祖高皇帝誕膺景命龍飛淮甸既渡大江
遂都金陵撫有區夏肇造洪眷以開萬世太平之業逮
我皇上繼承大統克紹丕圖仁恩誕敷聲教洋溢雨暘

應期民物阜蕃薄海內外罔不率從而自莅阼以來宵
旰拳拳惟思所以繼志述事以承太祖高皇帝之意於
是做古制肇建兩京以為北京實當天下之中陰陽所
和寒暑弗爽四方貢賦道里適均且沃壤千里水有九
河滄溟之雄山有大行居庸之固玉泉之流經緯乎禁
籞之中碣石之壯盤踞乎畿甸之內故其山川之壯觀
風氣之清淑真有以卓冠四方為萬國之都會誠帝王
子孫萬萬世太平悠久之基由是敕冬官泊内外文武

百執事經營於茲而凡民庶士卒工匠之流莫不駿奔
子來趨事赴功罔敢或後遂至天意人心感孚和同靈
應疊臻嘉祥屢薦不數年間厥功告成而宮闕府庫之
宏壯郊廟社稷之嚴肅朝市民物之矩麗秩乎其有序
升乎其具列蓋自古先帝王都邑之盛未有逾於此者
乃永樂辛丑春正月朔旦皇上御奉天殿大朝海內文
武羣臣四方蠻夷酋長率皆在庭踴躍鼓舞以為皇都
之奇麗若此誠曠古所未見而未有者而所以為皇上

萬壽之徵宗社磐石之固聖子神孫寶祚綿延之慶皆
兆於此矣何其盛哉臣叨居禁苑職業文詞幸際昌期
躬覩盛美謹鋪張為賦以彰太平之偉烈且以昭示於
無窮其詞曰維太祖之受命膺上天之貞符奮布衣於
淮右提一劍而長驅乃翦夷於羣醜悉蕩滌於寰區既
渡大江金陵是都虎踞龍蟠興王之居爰啓鴻業肇開
皇圖振光華於曠古恢萬世於宏模繫我聖皇祇膺寶
歷奉天勤民太祖是式恩覃九圍仁周八極雨暘應期

民物豐植覩四方之清寧乃有念於京邑維此北京太祖所屬天造地設靈鍾秀毓總交會於陰陽盡灌輸於海陸南臨鉅野東瞰滄溟西有大行之巖嶺北有居庸之崢嶸瀉玉泉之逶迤貫金河而迴縈瓊島上聳以盤礴太液下徹而澄泓將繼志而述事必於此而經營乃勅羣工乃命百職萬方子來効勤憚力萃四海之良材伐南山之鉅石感恩意之昭孚咸經營而弗亟於是天心協順靈應彌彰布輪囷之卿雲發璀璨之祥光醴泉

湧其浩浩甘露下其漘漘赫萬靈之呵護藹瑞氣於穹
蒼乃卜良辰乃蠲吉日以相以度以構宮室棟宇崇崇
簷楹秩秩以蓋以覆陶冶埏埴以繪以塗黝堊丹漆煥
五彩之輝煌壯九重之嚴密天地洞開馳道相連金鋪
絢日玉桂凌烟星羅棋列璧璨珠聯虹飛霞擁龍翔鳳
騫超凌氛埃壯觀宇宙規模恢廓次第畢就奉天屹乎
其前謹身儼乎其後惟華蓋之在中竦摩空之偉構文
華翼其在左武英峙其在右乾清並耀於坤寧大善齊

輝於仁壽豁千門之雲矗敞萬戶之輻湊至若丹闕巍
巍飛觀凌空觚稜上聳閣道遙通左祖石社蔚乎穹窿有
壇有墼有寢有宮亦有天地以嚴其崇復有石渠天祿以
蓄圖書玲瓏綺錢照耀文疏懸牙籤之萬軸列緗帙之紛
如宛奎畫之宵暎粲藜燈之夜噓瀛洲文學之士閭苑列
仙之儒備顧問於朝夕咸欽仰於聖謨又若大庖光祿
列乎西東珍饈駢羅玉食惟豐禁城之下金水溶溶畫
棟凌雲繡柱含風璇題耀日綵橋架虹雕甍隱暎寶殿

玲瓏太孫所居諸王之宮金枝玉葉照耀層空育德講
學宴適游從若夫御苑逶迤上林深窈有山有泉為臺
為沼巖谷谿谿雲霞縈遶走有奇獸飛有靈鳥樂寬閒
以棲息恣回翔以馴擾復有天閑十二駿骨軒昂渥注
神龍之種大宛名駒之良並權奇而雄傑或磊落而騰
驤又若廩庾輪囷惟萬惟億豐歲所儲累世之積玉粒
金穉露積充溢國用所資人足家給復有武庫巍巍戎
矛森列旗幟搖雲鎧甲耀雪凜凜白旄差差黃鉞四征

不庭以彰九伐奮軍聲之揚揚振皇威之赫赫又若內
帑充牣寶藏紆餘奇珍異產海匯河輸夜光之璧明月
之珠琉璃翡翠瑪瑙珊瑚瑱瑱琥珀火齊璫璣錦繡逆
運羅綺芬敷又若百司庶府有綱有目文武頡頏為國
鈞軸大學郡庠之並建琳宮梵宇之森矗列九衢之坦
坦引六階而相續閭閻櫛比闐闐雲簇鱗鱗其瓦盤盤
其屋馬馳聯轡車行擊轂紛紜並驅雜運相逐富商巨
賈道路相屬百貨填委丘積山蓄又若歌樓舞榭艷態

穠粧羅袖回雪清聲遶梁管絃嘔啞狎坐傳觴娛青陽
之麗景駐白日之飛光維小大之不遺仰制度之畢備
斯皆聖智之籌謀實出宸衷之經緯儼氣象之一新壯
規模於萬世屹鴻基之豐隆偉河山之巨麗貽子孫以
嘉猷紹先皇之初志邁豐鎬之舊規軼漢唐之遺制於
是厥功告成慶叶天人乃歲辛丑為孟之春王正之月
朔旦良辰聖皇臨御大朝羣臣内外文武濟濟彬彬戎
狄蠻貊工商士民稽首嵩呼抃舞歡欣筐篚具列方物

畢陳以饗以鋪洽此皇仁大一統而無外藹至和於八
垠臣忝詞垣叨職文字懷寵眷之彌深愧涓埃之無補
際千載之良逢幸微生之快覩傳盛事於將來奚往牒
之足數祝聖壽於萬年播皇猷於千古

聖德瑞應賦

有序

聖天子在位之十有五年為永樂丁酉是年十一月二
日始創北京之奉天殿乾清宮於時文武小大之臣以
洎百工藝能材智之流莫不駸奔趨事各竭其力以報

答聖天子生成之大恩未幾殿中俱現五色瑞光由地
亘天朗耀輝徹卿雲綵霽煜煜輪囷天花璀璨大如日
輪廻旋宮苑蔽虧霄漢金水河太液池水復凝瑞內含
諸象毫髮可鑑自是卿雲瑞靄繽紛雜遝無日不見文
武羣臣上表稱賀以為聖天子至德所感實應太平聖
心謙抑不敢自當復申勅百寮懋勤厥職以上答天眷
此可以見聖天子敬天勤民切切圖治之盛心超卓之
見匪惟度越百王誠足為聖子神孫萬世之龜鑑矣臣

忝列禁林職在紀述用鋪張為賦以傳示永久使天下
後世知我國家太平如此其盛也謹稽首頓首再拜而
獻賦曰惟聖皇之御極因龍潛而作都建兩京之偉觀
恢萬世之鴻圖中四方而正位畫千里而為區宅禹貢
冀州之域當天文析木之墟下行坤絡上振乾樞洪河
巨川既渾涵而聯亘重關疊嶂復磅礴以迴紆總陰陽
之交會盡海陸之灌輸斯乃天府之國是為興王之居
式宏開於景運名契合於貞符乃涓吉而經始乃選材

而庀工詢謀罔貳龜筮協從萬姓咸會四方攸同維仲
冬之凝沍盎和氣之冲融神靈協孚以交賛上帝監觀
而相成於是建奉天立乾清法剛健配高明壯鴻基於
九鼎揭皇極於八紘肆天庥之滋至紛總總而來呈既
彌旬而閱月羗日盛而日盈若乃瑞彩發舒其光五色
或紺而青或黃而赤或護日而圓或凌風而直上燭璿
霄下臨柱石繡楹耿耀丹闥有赫晶晶熒熒煜煜奕奕
昭晰輝融交映洞射爾其卿雲輪囷非霧非烟勃鬱布

濩郁郁紛紛錯綜成章五彩氤氲乍斂而合條舒而分
或圓若停蓋或長若垂紳或粲若張綺或麗若凝鱗胎
回河漢朗耀三辰至若瑤葩下垂彌空紛綸的璫璀璨
狀擬日輪炫碧含丹飄飄馥芬熠熠煜煜上騰高旻亦
有太液屢冰而瑞衆妙畢陳包含巨細層疊森羅壁聯
珠綴瑩徹方諸輝燦陽遂匪琢匪雕匪裁匪製脰暉化
工巧發神秘於斯時也百辟庶尹羣公卿士莫不蹈舞
歡揚屏息睥睨以為曠世之竒逢太平之盛事乃端沐

齋祓敷社陳詞再拜而進曰皇帝功高邃古化侔兩儀
德洽庶類仁育黔黎風雨時若百穀茂滋蠻夷咸附遐
邇緝綏圓靈薦祉柔祇效珍五行序三階平醴泉溢甘
露凝嘉禾植芝草生麒麟騶虞鳳凰長離籍籍紛紛合
沓歲牲斯皆前日之徵應盛世之福禋維茲肇造新宮
允協昌期萬靈敷佑民物咸宜誕昭景貺申錫蕃釐是
蓋天眷聖德佑啓鴻基彰皇明之偉烈開萬世之雍熙
雖武有遷錫之圖成有卜洛之舉曾何足以方於斯也

皇帝乃謙抑遜避寅畏悚惕登進羣臣戒厲訓勅慎乃
位修厥德毋恃安而忘危毋恃祥而自逸納赤子於泰
和措羣生於豐殖家無夭札之虞人靡饑寒之戚禮讓
行而俗化淳刑罰清而奸慝息上安下順內寧外謐庶
幾上答天眷茂衍鴻澤固邦基於久遠綿歷數於無極
貽生民永世之安為子孫不刊之式顧不偉哉於是羣
臣拜手稽首揚言曰皇帝敬天之命圖其難不圖其易
于其德不于其瑞誠國家莫大之慶天下無窮之惠臣

等敢不勉竭愚衷欽服明訓以副陛下拳拳之盛意載
歌曰瑞光耿兮五采份份兮卿雲粲兮五采成文兮瑤
葩麗兮藹璘璘兮冰華耀兮蘊奇珍兮帝京建兮瑞駢
臻兮皇德謙兮訓戒之諄兮寶祚隆兮景命維新兮聖
壽永兮何千萬春兮

聖德瑞應賦

有序

聖天子端居九重深惟皇考太祖高皇帝皇妣孝慈高
皇后生育勤勞昊天罔極夙夜圖報實切淵衷稽之佛

氏之書以為孝莫重於報親慈莫廣於及物而徵諸內
典惟薦揚功德可以少資冥福乃詔永樂十七年正月
甲戌於海印寺修建水陸大齋七晝夜單及幽顯咸膺
利澤振法寶之威光宏慈悲之願力旛蓋香花具足莊
嚴齋儀梵唄修潔整齊平等無礙均一高下維時后祇
薦祉百靈闡珍甘露布於祇園醴泉出於靈甕卿雲被
於霄漢瑤葩綵靄粲爛繽紛天休震動中外踴躍神人
協慶大禮告成然自非聖天子至仁純孝格於天地諸

佛世尊歡悅歆鑒皇考皇妣在天之應昭答感孚其能
致茲福應若是其盛哉羣臣稱賀聖天子抑而不居誕
降德音戒厲切至此尤足以感動天心國家臣民萬世
永賴臣叨列禁林忝職文翰不可無歌詠以播揚盛美
傳之後世故不揣蕪陋謹鋪張為賦以獻其辭曰我太
祖之應天以受命也不階尺土而開萬世之鴻基乃正
大統任君師建皇極昭民彝掃妖氛於八表一文軌於
四夷陰陽調而雨暘叙品彙蕃而百穀滋庶政咸和諸

福畢來此所以躋生民於壽域而措天下於雍熙者也
重惟聖后徽順柔慈身濟大業同起布衣化家為國正
位宮闈輔成內治翊贊萬機上以奉神靈之統下以理
萬物之宜此所以祐啓家邦恢宏慶緒而茂衍夫宗支
者也肆惟皇上繼承大統君臨萬方仰法成憲祇循舊
章顧昊天之莫報慨終慕之難忘怵惕惻愴瞻依徬徨
凡可以導宸游資冥福則無往而不致其力無所而不
用其情此所以致禮於大雄而託諸天以達其誠者也

乃涓吉日啓齋局具冊祝潔粢盛說無量之妙品揚大
梵之清聲於以展誠孝格聖靈溥惠渥洽幽明洋洋赫
赫剌剌熒熒嚴恭對越陟降在庭萬靈翕合杳渺娉婷
乃發佳祥以昭其成其祥維何甘露之盈被柯綴葉玉
屑珠凝飴甘肪白純陽之精澤潤于下靡物不承亦有
醴泉必芬其馨潛通地脉發其精英如濤之沸如川之
騰湛恩汪濊溢于八紘有粢其雲五采成文昭回於天
布護紛紜凌颺抱日蔭於祇園麗景流輝垂耀天門至

若瓊葩下降飄飄繽紛圓暎皎日輕颺芳塵流丹曳紫
凝澱含纁焱焱灼灼煜煜璘璫復有祥光五色揮霍冲
融煥若火齊欽日歆空迴翔歛舒淺深淡濃奇形異態
變化莫窮於斯時也春陽應候緒風解凍靈芬充牣天
人和同歡聲溢於中外抃舞集於華戎皆曰此聖朝之
大美千載之奇逢蓋上天以是而昭至德答宸衷衍皇
圖福聖躬納斯民於仁壽而開太平於無窮者也於是
大夫卿士百辟羣工乃齋被上表稱賀九重惟皇謙讓

祇畏寅恭親發綸音載厲載敕慎乃庶位必於一德以
答於天以報於國惟德之崇匪瑞之暱羣臣祇奉訓言
罔不戰惕乃頓首揚言曰皇帝奉天體道恭膺寶歷宵
旰靡寧緝熙庶績丕隆孝治四方承式仁沃幽潛恩流
動植竒珍異產充積填溢維茲裡薦以孚以格誕降靈
祥輝輝奕奕天眷用彰是畀是錫奚聖心之謙抑乃峻
辭而弗居是將以仁為祥以義為瑞而弗寶於貞符蓋
自生民以來之所未有所以邁漢唐超禹湯而婉黃虞

也臣忝侍從游泳鑿坡頌神堯之寶露協虞舜之賡歌
邁九成於唐室軼三燭於汾河際太平於今日奚遭遇
之孔多是將登歌乎清廟期永世而弗磨歌曰聖孝兮
孔昭衆瑞兮駢聯聖壽兮彌永億萬兮斯年又歌曰皇
仁兮溥洽皇道兮昭明上天兮申命萬邦兮永寧

瑞應甘露賦

駕留北京

惟太祖之仁聖寔受命於上天奮一旅於淮右掃羣雄
於八埏拯生民之墊溺韜宇宙之戈鋌爰統臨於寶祚

乃主宰乎神人首建皇極正彝倫脩禮樂宣人文握乾
符闡坤珍鼓化機於品彙萃和氣於兩間紛四裔之來
王致諸福之便蕃此所以創業垂統積德累仁開太平
於萬萬世而啓鴻基於萬萬年也洪惟我皇神聖文武
祇承大統撫馭寰宇仁信侔於湯文恭儉同乎堯禹溥
湛恩於萬物沛膏澤於下土由是洽柔祗格圓靈三光
全寒暑平慶雲粲景星明醴泉澧湧黃河泓渟騶虞生
而麒麟出嘉禾薦而秀麥呈肆天庥之滋至羗異瑞其

駢臻然猶未足以昭至德表至仁此甘露之所以復降
而嘉禎之所以沴應也惟彼甘露寔降孝陵孝陵戢戢
鍾山之下太祖陟降神靈所舍禋薦時享來祈來迓聖
靈慰悅顯佑協相感我皇之誠孝恒洋洋而在上繄降
福而垂慶屢昭錫乎嘉貺時惟子月氣和如春天乳明
潤膏露繽紛溥松綴栢淋漓郁芬彌山布谷敦鬱璘玢
浥浥厭厭晶晶熒熒連朝累日屢降屢盈於是皇儲乃
祇肅齋沐取以薦神宮告宗枋復馳表致賀獻于天庭

皇上恭天之賜乃御大朝集百辟進羣公卿而告之曰
惟太祖在天之靈監觀四方昇朕以神器之重寔賴爾
臣鄰一德一心勤勞贊襄救寧區夏燮調陰陽風雨時
叙五穀豐穰兵寢刑措民物阜康惟茲天降甘露所以
表應太平嘉惠萬邦朕不敢祕天之貺用頒賜於爾臣
鄰以昭上天之隆眷以承太祖之耿光其益竭乃慮厲
乃志勤乃政敬乃事無藻辭以矜誇無滿盈而怠肆庶
幾休戚是同共保終始措天下於久安致國家於長治

福祿流於無窮聲名著於後世豈不偉歟於是羣臣咸
拜手稽首曰惟皇上恭敬天地致孝祖考輯和民人惠
養耆老德洞淪冥恩被遐壤故天不愛道甘露呈瑞此
感彼應理所必至而乃並存謙抑推而不處視彼植金
莖以承液誇嘉瑞以紀年者不可同日而語矣是宜勅
太史以紀載美盛德之形容播諸金石被之管絃以示
聖子神孫於無窮為之頌曰瞻彼孝陵松柏蒼蒼兮上
天降康甘露瀼瀼兮至和所萃至孝之格兮惟皇謙撝

弗盈弗溢兮憲章太祖以承於天兮永膺景命億萬斯年兮

瑞應麒麟賦有序

臣聞人君有至聖之德者則必有至盛之治有至盛之治者則必有至大之徵此感彼應皆本於一心之誠非人力所致而自至者欽惟皇上建中垂統法天敷治恢宏鴻化覃暨無外和氣融朗嘉應疊臻乃永樂十有三年秋九月壬寅西南夷有曰麻林國者以麒麟來獻夫

麒麟仁獸也中國有聖人在位則出王者有至仁則見
惟我皇上自蒞阼以來仁洽庶類德洞幽明凡極天所
覆極地所載極日月之所照臨莫不煦煦然甄陶於化
育之內曾未逾年而麒麟之瑞凡兩至闕下羣臣上表
稱賀皇上情存損抑推而不居以為國家之瑞不在於
物惟刑政脩明奸宄不作時和歲豐民物康阜同躋於
熙明仁壽之域乃足為瑞且復舉前代溺好祥瑞誇詡
張大極滿盈驕奢而底於亂亡者歷指以為戒於以見

皇上之勵精圖治憂深思遠不自滿足而其心之誠真足以參天地贊化育度越百王垂法萬世豈惟天下臣民之福實國家億萬載無窮之慶也臣備員禁林職在紀述叨沐鴻恩荐覩上瑞用著其實美盛德之形容而為賦以獻其詞曰惟聖皇之奉天而履寶祚兮主上下之神人暢仁風於六合兮宏至化於八垓調玉燭以和四時兮順軌度以齊三辰納民物於康阜兮無彼此而不均盡鴻休之翕集兮協嘉禎之駢臻致內和而外輯

兮故邇懷而遠親南濮鉛而北祝栗兮東扶桑而西覓
崙或異言而詭服兮或雕題而文身畢稽首以效順兮
舉駿奔而稱臣薦庭寶之旅百兮紛焜耀於奇珍沂西
南之絕域兮蓋嘗產乎麒麟仰聖人之在位兮四三譯
而來賓屬茲麟之再見兮亦逖處於海濱豈尋常之克
致兮寔感召於皇仁繫麟之為瑞兮首四靈而孔神合
二氣以賦形兮萃五行而胚暉至和為之育精兮大化
為之陶甄匪質殊而形異兮尤抱貞而含純角笋植以

周正兮蹄玉潔而璘霏矯蒼龍之脩領兮槃元龜之奇
文尾毵毵以肖牛兮身磊磊而象麇閔生物以弗茹兮
避蠕蠢而弗跼步驟中於矩矱兮鳴聲協乎韶鈞絕蹊
觸以穆穆兮藹仁厚而振振衆靈從以先後兮百神呵
護而紛員山川濯濯以發秀兮草木郁郁而揚芬條光
氣之上騰兮爛五采於蒼旻肆遠人之仰德兮將獻瑞
於吾君爰潔齋以告神明兮謹上貢於天閭駕檣帆於
巨海兮揚旌旆於飛雲川祗為之歛浪兮風伯為之清

塵詔陽侯以先驅兮役海若而後奔屏魑魅與魍魎兮
走蛟鰐與鯨鯢龜龍左右以迴翔兮鸞鳳相參而繽紛
歟超度於滄溟兮遙整駕於平原垂以赤闌之雕檻兮
藉以紫綺之文茵祥風載路以沕穆兮卿雲垂空而綢
繆假金臺以留憩兮欸明廷而獻陳儀舒舒以容與兮
體肅肅而安馴迫之不懼兮撫之不震倡率舞於玉階
兮聆九奏於金門被日月之光寵兮沐雨露之榮恩重
瞳屢顧以嘉悅兮臣工竦躍而歡欣固作長於百獸兮

寧下儕於毛羣廓玄圃為之圃兮截瓊島為之藩以拔
視為爪牙兮以騶虞而為隣食玉英之芳潤兮嗽醴泉
之甘新應四時以和鳴兮符至德於乾坤贊鴻化於幽
默兮熙大運於厖醇朝叅鑒輅於瑤池兮暮陪仙仗於
紫宸猗歟麟哉昭文明於盛世兮偉奇觀於前聞彼周
南之詠歌兮邈形似而難真揭殿閣以嘉名兮異漢唐
之足云惟聖德之淵玄兮軼前古而莫倫體大舜之兢
業兮法聖禹之憂勤躬節儉而彌約兮蘊至道而彌敦

讓嘉瑞而弗居兮履謙光而益尊戒臣僚以脩飭兮毋
傲驕而怠昏遵成憲於皇考兮佩無逸於聖言上以承
於宗廟兮下以庇乎生民庶長治而久安兮錫純祉於
子孫斯宸衷之所以拳拳兮而聖訓為之諄諄顧小臣
之猥陋兮忝載筆於詞垣瞻榮光於日下兮覩盛美之
便蕃慙紀述之弗工兮罔裨益於寸分願永歌於天保
兮祝聖壽於萬春

師子賦有序

欽惟聖天子膺受天命統紹洪基厚德深仁覆冒無極
仁聲義聞溢于八表故東極扶桑西抵月窟南踰雕題
北底窮髮自前代所不通中國所不聞者其人莫不嚮
風慕義畏威懷德重譯接踵而至蓋自三代以降未有
盛於今日者也乃永樂十有三年九月丙申西域遣使
以師子來貢考之載籍師子即狻猊也如魑猫能食虎
豹銅爪鐵額鋸牙鑿齒尾端有茸毛大如斗許蓋為毛
羣之長夫百獸莫猛於師子居深山大谷之中非可以

力致而羈縻也今乃自月窟逾崑崙越大漠歷數十萬里隨使者以達於闕下有以見皇上之威德遠著而師子之雄猛悍驚亦皆帖然馴伏自致於中國則所以柔懷遠人威服不庭風飛雷厲於窮荒絕域之外者於是而可見矣臣忝列班行躬逢盛美不可默而無言謹拜手稽首而獻賦曰於惟我皇聖神文武恢治化於八紘播仁風於下土無一物而不獲其寧無一民而不遂其所三光以之而平四時以之而序曰暘而暘曰雨而雨

時和歲登豐於禾黍致奇祥與異瑞遂駢臻而沓至肆
聲教之攸隆式廣被於遐邇彼卉服文身之鄉瘴雨蜚
風之地既慕義以嚮風亦獻琛而奉贄惟茲西域綿邈
萬里乃有神獸曰為師子鐵額銅爪鋸牙鑿齒紺眼赤
毛鬣纓茸尾其氣猛而威其力悍而驚哮呼則震雷
霆奮擊則糜碎犀兕屬遠人之感化納職貢於包軌奉
神獸以來朝慕越裳之白雉涉流沙以東向逾昆侖而
南指凜飛霜之稜稜颯長風之纚纚覽金臺之嵯峨闔

天開之截巢百辟為之駿奔天顏為之嘉悅於以彰聖
皇之威武於以昭盛世之文德熙神化以彌流亶聖心
之無斁措斯世於太平遂民生於豐殖隆國家萬年之
安軼曠古無前之績臣叨列於班聯仰天顏之咫尺幸
目覩於奇珍敢敷陳於悃悞祝聖壽以悠長頌皇圖於
無極

瑞象賦有序

恭惟皇上膺受天命統紹洪基仁布寰宇化周六合是

以扶桑月窟之境雕題窮髮之地莫不梯山航海奔走
來貢蓋自三代以降未有盛於今日者也迺永樂十六
年秋九月庚戌占城國以象來進其狀瑰詭雄壯元膚
玉潔文有白章粲若華星郁如雲霞拜跪起伏馴狎不
驚斯實希世之上瑞天下太平隆盛之徵夫百獸之中
其强悍勇猛者莫逾於象非若虎豹熊羆之屬可以
力制今占城以是象來貢既有以見其形質之美而其
馴擾狎習似與仁獸無異於以見聖德之廣大被於幽

遠草木鳥獸咸沐恩光而其感化之妙固與鳳凰來儀
百獸率舞者同一效驗之大矣臣忝職詞垣幸際聖明
屢覩嘉祥之盛不可無紀述以詠歌太平謹拜手稽首
而獻賦曰惟我皇明受天命臨寶位治文德隆至治際
天蟠地覆冒無外明無幽而不燭化無遠而弗被惟諸
福之畢來致嘉禎之駢萃羗萬國以來庭咸輿琛而奉
贄或貢以威鳳祥麟或獻以錦豹靈犀或進以渥洼龍
丈之天馬或奉以西域卷鬣之神獅其他若瑤琨球琳

大貝明珠珊瑚瑪瑙琥珀瑱珍奇異產海委河輸紛
沓焜耀雜然前陳則又不可以備書也粵有巨獸魁然
其狀潜海濱以廻翔匿長林而自放勢侔山嶽之穹窿
力抵萬鈞之雄壯其生也大塊孕其真至和毓其精瑤
光助其神斗宿濯其英然後走百神集衆靈播休氛協
嘉楨忽乘雲而下降倏天開而日晶采眈眈而煜煜文
璨璨而璘璘耿繁星之布濩瑩雪花而繽紛如肪之潔
如玉之溫經以白理緯以玄黃備衆采以交互紛五色

而成章炳炳蔚蔚熠熠煌煌六甲為之呵衛五丁為之
贊襄嶽祇因之而獻瑞坤珍以之而效祥於是番酋夷
長睨之而惕驚象胥虞人望之而辟易不假鞶檻而自
致匪藉爵羅而自格乃告神明消吉日載之以蔽空之
長舟藉之以幕雲之文席左叱陽侯右麾海伯風師前
驅而縮恧天吳後從而匍匐迅颿為之帖息魍魎竊伏
以藏形楔揄遠引而遁迹欵星馳而雲駛逾萬里於倏
忽沐恩光於九重近龍顏於咫尺觀其拜跼有常動止

有節既容與而弗驚亦安舒而自帖萬姓為之駿奔百
僚為之欣悅麒麟叅之以翺翔虞隨之而蹙躅予以
導乘輿服鸞輅備萬舞協韶護宣人文昭皇度兆至德
之禎符綿萬年之寶祚圉斯世於泰和措羣生於豐遂
熙鴻化以彌流亶聖心而祇畏將以明刑弼教保民圖
治答景貺於上天貽嘉猷於後世又豈徒誇盛美侈多
瑞為目前之奇玩而已哉臣忝廁列於禁垣幸瞻依於
日月愧學術之粗疎莫形容於萬一爰續述於見聞冀

具存於事實揚盛世之休嘉著無前之偉績祝聖壽以
悠長頌皇圖於無極為之頌曰惟皇神聖上帝之命統
臨萬方靡不從令維帝監觀禎祥之格丕昭神化洽此
文德皇不自聖益敬於天匪象之瑞所瑞惟賢大哉皇
仁覃被八紘如天之行如日之升上帝之歆協于皇德
億萬斯年其永無斁

駝雞賦

永樂己亥秋八月吉旦西南之國有以異禽來獻者稽

往牒而莫徵考載籍而難辨皇帝御奉天門特以頒示
羣臣莫不引領快覩頓足駭愕以為希世之罕聞中國
所未見其為狀也駝首鳳喙鶴頸鳬臆蒼距鳩攬脩尾
齒萃雄姿逸態鷙武且力衡不逾咫高可八尺名曰駝
雞生彼蕃國想其質乘火德體孕陽精目含碧而星耀
頂凝紫而雲蒸步凌風以聳拔翼摩空而崢嶸冠莪莪
以高翥聲膠膠而振騰豈羽毛之同族寔異狀而殊形
感聖德之遠被將獻琛於天庭爾其分重譯辭海陬貯

以雕籠載以長舟風馭指以前路川后導以安流鵬鵬
相參以迴翔精衛從之而夷猶駭天吳兮走列缺懼蒼
螭兮奔素虬晞晨光於暘谷弄夕景於瀛洲倏忽萬里
達於九重闊步長趨氣凌太空性寔馴狎貌甚雍容昂
首拂青雲鼓翼生長風山雞野雉不敢敵青鸞紫鳳同
翔翔食以玄圃之金粟飲以瑤池之瓊漿顧依托之得
所何遭遇之非常繫聖皇之宵旰政圖治之未遑法勤
勵於湯禹倣至德於虞唐念司農之作戒冀警旦而弗

忘敢耽翫於遠物有一息之急荒惟雨暘之順序洎民
物之阜昌暢至仁於六合躋四海於壽康斯宸衷之拳
切而聖心之所望臣日覩於盛美愧陳詞之弗臧頌聖
壽於萬年同地久而天長

黃鸝鵲賦

繫羽毛之為類紛總總其莫量何鸝鵲之獨異稟姿態
之非常既弗白以弗綠亦匪玄而匪蒼秉純黃之正色
乃毓德於中央觀其質自天成胚由地育戊己儲精坤

元孕淑娟娟其容炯炯其目纖喙巧舌紺爪丹足謝濃
翠於禿襟翦微紅於膺腹肌一色以裁柘體渾全而染
菊通其身遊南詔迹遠隴西映日光絢含風翊低思靈
泉以就飲應嘉木而擇栖鄙昂藏之文鵠陋睨睨之黃
鸝誓永托於遐壤甘獨處而弗移何遽聞於守將遂遠
辭於山靈爰戒斥堠勿擾勿驚爰飭虞衡勿弋勿矰茲
靈禽之間見將效瑞而來庭於是祥風乍迴卿雲滄興
忽低飛以自馴竟竦立而亭亭怡情閒暇弄影娉婷乃

諏吉日乃告前征盛以五采之雕籠栖以雙玉之寶藥
馳萬里以遠涉瞻九重而獨登于時聖皇御朝撫臨萬
國天仗宵嚴閭闔晨闢敬再拜以入獻粢文采之輝赫
晃初日以爭妍耀金鋪而一色凝眸注視想婉婉以酬
恩延頸訴言期從容而報德惟聖皇之謙讓乃情存於
損挹誠弗貴於珍奇亦豈寶於遠物思宵旰以圖治並
寅恭而戒惕蓋將措斯世於雍熙而納天下於仁壽之
域者也臣忝侍禁垣職業文字逢千載之昌期際文明

之盛治瞻羽族之靈祥美物類之奇異耶陳賦以形容
冀垂聲於後世賦已而為之歌曰天生羽族萬有不同
兮異哉此禽既慧而聰兮稟色純黃昭聖德之中兮又
歌曰奇哉此禽既聰且慧兮含靈解語巧通人意兮知
德報恩頌聖壽之萬歲兮

太祖皇帝御書贊有序

皇上宴閒出示太祖皇帝所書御製嘉禾詩一首雲章
爛然輝映日星羣臣駭躍爭先覩之即日摹刻諸石刻

成取拓本裝潢成卷越十有二日御奉天門頒賜羣臣
公卿幼孜幸得與賜焉臣竊惟太祖高皇帝龍飛淮右
提一旅以靖禍亂混一六合休養羣生修禮樂以致太
平涵濡漸漬垂四十年百僚效職四裔承風惟時嘉禾
屢登四郊之民無凍餒之憂廟廊之上垂拱雍容聖情
悅豫親御翰墨著為歌詩泃泃乎洋洋乎雄偉壯麗渾
然天成至其字畫之超詣天機逸發森若飛動雖龍跳
虎卧鳳翥鸞翔不足以喻其妙此誠天縱之能聖學之

餘也皇上纘承丕緒祗迪先猷披閱手澤如對尊嚴用
勒堅珉藏之秘府以昭示萬億年永永無極顧臣菲薄
而亦竊獲此賜寵榮焜耀稱頌難名謹當珍襲傳之子
孫視為至寶乃稽首頓首再拜而為贊曰天眷有德真
人興篤生太祖基皇明天戈奮舉驅雷霆救民水火壺
漿迎彊摧暴滅民以寧洒掃宇宙無穢腥功成定鼎居
金陵龍蟠虎踞奠神京制禮作樂羅羣英百辟濟濟良
股肱九重垂拱臨大廷華夷皞皞皇風清神功聖德不

可名四民安堵萬物成五風十雨和氣蒸東郊忽報嘉
禾生異畝同穎爭敷榮乃知至和兆休禎天降嘉瑞非
農耕我皇體物周民情手揮寶翰榮光升羣臣環視喜
且驚鏗鉤金石韶鈞鳴渾涵風雅遺葩經天章璀璨輝
日星奎壁分曜含晶熒龍蛇走勢鸞鳳騰珊瑚玉樹紛
縱橫惟帝繼述隆孝誠對閔宸翰欽聖靈慨念手澤思
善承到此琬琰勝瑤瓊寶函鈿軸黃金滕藏之秘府垂
千齡勅賜百官恩寵并小臣忝竊依蓬瀛荷此寵錫慙

弗勝作詩敢謂諧頌聲願效康衢歌太平

麒麟贊有序

臣聞麒麟天下之大瑞也帝王之德上及大清下及大
寧中及萬靈則麒麟見又云天不愛道地不愛寶人不
愛其情則麒麟見又云王者德洞淪冥化及羣動則麒
麟見是則麟之出必聖人在位當天下文明之日固不
可以幸而數致也欽惟聖天子嗣大歷服法天圖治勵
精宵旰致理萬機仁聲義聞洽於遠邇德教覃被民物

和會四方萬國靡不歸戴於是天監聖德景貺屢臻而
十有七年之間諸福之物紛員充牣史不絕書乃永樂
甲午秋九月西南夷有曰榜葛刺國以麒麟貢明年乙
未秋九月有曰麻林國以麒麟貢今年秋復有曰阿丹
國以麒麟貢五六年間麒麟凡三至京師烜赫昭彰震
耀中外誠千萬世之嘉遇而太平之上瑞也昔者黃帝
道隆德盛麟僅出於囿周南雖托諸歌詠而未覩其真
降及漢唐寥寥無聞今聖天子德協重華功高曠古厚

澤深仁涵浸無間而茲麟之祥屢見而不已蓋上天以
是彰顯聖德為王化之大成誠宗社生民萬萬年無疆
之慶也臣忝列禁林日覩嘉禎不勝榮幸用述為贊以
傳之久遠謹拜手稽首以獻贊曰猗歟仁獸異狀奇形
二儀胚腴玄枵降精龍顧聳拔肉角挺生紫毛白理龜
紋縱橫其質濯濯其儀彬彬有趾弗踈惟仁是遵有角
弗觸惟義之循步中規矩音協韶鈞養綏撫幼藏嘉思
邇四時垂化其鳴弗愆是名麒麟出應於天待時而至

弗後弗先萬里來賓載邁載馳瑤光燭霄卿雲下垂重
瞳屢顧衆抃以嬉大開明堂坐以納之於惟我皇法天
圖治聲教流行東漸西被無幽弗燭無遠弗暨川滙雲
奔稽首奉贄爰集大瑞後先駢臻何以致之惟皇之仁
惟皇之仁洽于八垠極天際地罔不尊親惟皇謙恭弗
自為聖匪物之珍協于仁政惟皇奉天丕顯大命聖壽
萬年四方之慶

獅子贊有序

聖天子莅阼之十有七年德化大成無有遠邇畢獻方物乃秋八月甲午西南夷木骨都東國復遣使以獅子來貢夫百獸之極莫逾於獅子其狀銅爪鐵額鋸牙鑿齒聲殷殷若雷居深山大谷吞嗜虎豹非可以力制也乃今日自海外歷數十萬里隨使者以進於以見聖天子之威德遠著覃及庶類故雖雄猛悍驚之獸非人力所可制者亦皆帖然馴伏自致於闕下則所以柔遠懷邇威服不庭風飛雷動於遐陬絕域之外者於是而可

想見矣臣叨列禁林職業文字躬覩盛美不敢自默謹
為獅子贊一篇上獻贊曰明明天子文武神聖撫馭萬
邦膺天眷命萬邦協和是承是式無強弗庭無遠弗格
山梯海航方物畢至奇祥異珍川湧雲萃曰有神獸名
曰獅子殊姿異狀傑特雄偉豐臆廣額目炯如鏡筋骨
糾纏氣剛力勁鋸牙鉤爪茸尾盤旋髯形纓妥柔毳霜
妍奮鬣雷鳴摧山裂石虎豹懾威熊羆褫魄長林大麓
沐浴雨露山靈嶽祗前後呵護遠人導之弗繫弗拘歛

越來歸匪迫匪遽爰涉巨海汎以長舟登貢大庭式彰
鴻庥惟明天子化及羣類草木昆虫以育以遂致茲神
獸不擾而馴匪獸之馴格于至仁惟明天子奮揚威武
洽以文德孰為旅拒周書白狼漢紀玄犀孰若茲獸感
化屢來惟明天子道隆德至駿烈神功作配天地臣拜
稽首天子萬年聖子神孫永世其延

神龜頌有序

洪惟太祖皇帝功德之隆如天地之大亘萬世而莫及

皇上繼承丕緒思述神功紀於穹碑爰命工取石於龍潭山之陽久之惟碑碣未得乃掘地三丈許忽得石龜隆然若蹲形體之似宛若生成九疇參錯有自然之文匠石驚愕以為神異遂奉以獻於大廷有詔俾臣民觀之莫不歡欣駭躍咸曰皇上仁孝感孚故上天昭示景貺雖神禹洛書之呈未足擬倫臣幸依日月之光重沐雨露之澤覩茲盛美喜不自勝謹拜手稽首而獻頌曰於惟聖祖作民父母濬哲溫恭聖神文武伊昔元季羣

醜爭雄天戈所麾罔不率從救焚拯溺用寬伐虐治定
功成制禮作樂聲教四達宏布紀綱振彼枯弱鋤其暴
強蒐羅賢俊樹立藩屏蠻夷戎狄稽首奉命既集武功
益綏文德拱手垂裳不假聲色休養生息垂四十年俊
德成功巍然煥然維皇嗣之聖作物覩功高湯文德配
舜禹舊章成憲皇則率之萬方黎民皇則綏之繼志述
事躋於至治嘉祥駢臻諸福畢至惟皇至孝思念神功
欲託穹碑昭示無窮爰求貞石不日而得既求厥趺龍

潭之側眷茲龍潭孕秀鍾靈坤后效職至和儲精乃擘
丹崖乃破蒼壁佳氣氤氲祥光赫奕忽得石龜隆然若
蹲匪金以鎮如玉而溫素理玄介光輝的爍人文聿宣
奇偶叅錯藉以文錦獻於大廷臣庶聚觀歡聲沸騰在
昔夏禹洛書獻瑞聖聖相承先後一揆太祖之靈陟降
在天聖孝感通有開必先神龜所徵聖壽萬億小臣作
詩永永無極

白鳥頌有序

聖天子莅阼以來禮敬宗廟恪恭神人禋祀天地誠孝
感孚靈貺昭答由是雨暘順序五穀歲登諸福之物先
後踵至乃永樂己亥夏四月癸巳順天府尹臣諤奏廳
前槐樹有烏營巢其上產雛二其一毛羽潔白瑩如玉
雪朝往暮來馴狎尤甚斯為上瑞實應太平天子可其
奏遂登進於廷文武小大之臣莫不爭先快覩揄揚舞
蹈以為聖天子至孝至仁之所致臣幼孜退而稽諸載
籍有曰烏孝鳥也能返哺天子有至孝之德則白鳥見

又曰烏仁禽也性至慈天子能禮敬宗廟則白鳥至今
順天實古京兆為四方表率而政教之所先也一旦白
鳥之見不於他所而適出於輦轂之下達孝純誠格於
宗廟至仁厚澤洞于幽明德化流行洽於遠邇蓋與關
雎麟趾之應異世而同符者矣臣叨列禁林獲覩盛美
敢不鋪張聖德以形容太平傳示無極謹拜手稽首而
獻頌曰於惟聖皇受命自天治洽重熙極於八埏禮樂
教化期於躬行曰惟事天必敬必誠孝奉祖考寅畏肅

恭儼若羹牆接於聲容俯仰降升神靈翕赫不享亦臨
不顯亦式達孝尊親始於家邦錫類之仁覃及萬方濟
濟雍雍忠孝友弟曰父而父曰子而子時罔乖悖亦靡
鬪爭上熙下恬咸樂和平雨暘時若稼穡蕃庶人足家
給兵寢刑措皞皞熙熙八表同春嘉禎翕集靈貺駢蕃
惟此順天實古京兆有烏營巢乃育乃轂既生二雛一
乃純白雪毳霜翎輝潔潤澤煦之哺之弗驚弗驚肪切
玉琢熠燿晶熒鶴奪其皓鸞失其素臣謬尹京曰此上

瑞乃涓吉日齋戒以俟載之雕籠護視惟謹癸巳昧爽
再拜以進露凝縞毳香襲素襟照影瑤砌耀采瓊林重
瞳屢顧百寮抃驚咸云此瑞聖德之徵昔在虞周流赤
騰芳孰若今日變白效祥維皇神聖涵育兆民烏實仁
禽其容振振維皇仁孝格於祖考烏克返哺其儀縞縞
玄鳥兆殷神爵興漢白鳥之祥式昭聖代臣拜稽首

闕

瑞應騶虞頌有序

臣聞天子有大德則克當天心以享天命故上天慰悅
昭答景貺以兆億萬年無疆之慶洪惟聖天子祗膺大
命統承寶祚敬恭天地嚴奉宗廟輯和人民七緯順度
九有寧謐乃宣德己酉春正月南京守臣來言有騶虞
二見於滁州之石固山謹卜日遣人馳獻粵二月十又
三日達闕下上賜文武臣僚泊四夷朝貢之使觀之白
質元章膚體明潤馴擾安適弗懼弗驚中外抃舞歡揚

咸曰此國家上瑞天下太平之徵非偶然而致者臣竊
惟太宗文皇帝以聖神文武之資統馭華夷深仁厚澤
涵浸無外在位之日四方以祥瑞進者輻輳于廷而騶
虞凡兩見至今猶赫赫如前日事惟我聖天子以聖繼
聖化洽宇內仁及庶類雖莅阼以來嘉祥屢至而未有
若斯仁獸者駢臻並見於一日之間徵之往牒實為希
奇自非聖天子之至仁大德足以上當天心曷克臻茲
誠宜播之聲歌編之簡冊以丕昭鴻休於無窮臣不勝

欣躍謹拜手稽首而獻頌曰維皇嗣統膺命上天睿知
文武以馭八埏祇率舊章法祖圖治選賢簡能以布庶
位五行順序三光昭明四方來同萬姓以寧洎於幽潛
跂行喙息總總林林咸被茂澤太和綢繆充塞兩儀涵
毓靈祥益蕃而滋乃有仁獸駢出畿內造化胚暉適與
時會其見於何滁山之陽瑞靄祥氛為之低昂穆穆眈
眈有白其質亦立以文匪羣之匹不角不牙匪兕匪羆
蹈義含仁惟德之符正月令辰紫光四被守臣告祥山

靈效異祝網既除爵羅弗張乃服軒車載趨載行既安
且馴不虺以怒祥飈汎川彤雲載路維春二月進於九
重天光低徊風日朗融於時都人於時卿士於時蠻夷
咸稱上瑞兆時聖徵有煜其光至仁之應太平之祥在
昔太宗功成治定騶虞再見亦惟德之應維皇奉天昭
格上帝眉壽萬年以同於天地

瑞應元兔頌有序

皇上御極之五載政教大行德化覃被陰陽和寧風雨

時叙萬方熙洽咸際光明故嘉禾之生仁獸之產諸福之至不一而足是歲己酉之春元兔見西陲守臣寧陽侯陳懋奉以進粵夏四月亥兔再見懋復以進皇上皆以賜羣臣觀之毛質郁然溫潤敷腴黦若玄雲跼伏翔躍馴擾絕倫斯乃仁獸實為上瑞沂厥所由蓋本於皇上純仁至孝格於祖考通於天地洞於幽明之所致夫仁為五常之首孝為百行之本推其極至於天地位萬物育不越乎是二者而已皇上受天明命統治華夷秉

仁履孝惟日乾乾一舉動而必由於仁一食息而不忘
於孝故內有以理於家外有以化於天下無一民而不
囿於至和之域無一物而不臻於熙皞之中是以和氣
之發充塞無間致茲異瑞駢臻沓至於以見天人感應
之機如桴鼓影響有不可誣者既而羣臣奉表稱賀皇
上尤心懷謙抑讓而不居且曰休符不於祥於其仁不
於其物於其德盖切切焉視以為警無一毫滿盈自足
之心斯實宗社靈長之慶天下生民之福而太平洪盛

之徵也是宜美盛德之形容播之樂歌以昭示聖子神
孫於千萬年臣叨列朝行躬覩盛美無任欣躍謹拜手
稽首而獻頌曰皇受天命作主下民功配於天德通於
神治教休明恩覃八埏邇無不協遠無不臻羣生滋植
丕圉陶鈞諸福薦祥有來續紛眷彼西陲實同內地坤
珍發靈嶽祗闡祕望舒流彩玄冥表瑞爰毓靈毓毛質
超異匪褐而黜匪蒼而黜如漆之瑩如墨之漬光潤澤
潔霧涵雲萃既擾既馴弗維弗繫守臣以告曰為禎祥

祇奉以貢維日之良山靈先導祥飈載揚爰涉大河爰
歷崇岡逡巡萬里進於九重榮光彌布郁郁彤彤天顏
愉穆屢回重瞳乃詔卿士乃進百工賜觀於庭頌歌渢
渢咸曰斯瑞曠古竒逢何以致之維皇之德其德維何
孝仁之積上天監觀祖考歆格洞幽徹明於昭赫赫臻
茲泰和嘉生駢錫化洽仁孚徧於方國皇曰噫嘻斯豈
朕能維天祖考付畀匪輕敢肆怠驕以隳厥成尚弼予
治業業兢兢保茲大命以底厥寧永靖四國福我羣生

於時百辟再拜稱慶祇奉聖訓罔敢不敬臣拜稽首天子仁聖式是祖考恭天之命臣拜稽首皇仁如天大明一統天子萬年

御編為善陰騭書頌有序

嘗觀天地之於萬物包含徧覆發育滋長莫不欲使之各得其所是以足者跂而味者啄翼者運而栽者植洪纖高下蠢蠢蚩蚩莫不有以自形自色而各圓於化育之中聖人之治天下也亦然德禮以導之仁義以勸之

孝弟忠信以成之使其老少尊卑之有其倫民彞物則
之有其常林林焉總總焉莫不有以各循其性以歸夫
至善之地故其功效之大至於參天地贊化育有莫知
其然而然者洪惟聖天子統承大寶十又八載夙夜拳
拳惟欲以善化其民開導誘掖懇切至到父焉而教以
慈子焉而教以孝臣焉而教以忠為兄弟而教以順為
夫婦而教以和為朋友而教以信是以四方萬國熙
熙皞皞歡欣鼓舞咸蒙夫至治之澤同歸於仁壽之中

德化之盛蔑以加矣而聖心歎焉猶以為未足萬幾餘
閒載勞聖慮以為古之為善有陰隲於人者恒不求其
知不責其報施之於冥冥之中若無所與焉其後卒顯
於其身被於子孫光榮始終澤流無窮此其人雖無求
知責報之心而天之所以報之者不爽毫髮歷代以來
其人載之簡冊者不可悉數然求觀其實則散於編籍
不能盡閱苟或加以披覽之勤則又得於此而遺於彼
雖欲事事效之誠有難于為力乃博采傳記凡有陰隲

而獲其報者彙為一編分類成卷復為論斷而系之以詩名曰為善陰隲特命鋟梓頒賜天下臣民使羣居類處者不待面命耳提而自知善之當為德之當脩而凡所以矜智以挾詐恃力以銜巧利己以損人縱欲以害物者皆不使作於其心消其邪穢之行絕其繆戾之萌如披雲霧而覩青天脫煩囂而沐甘雨欣慰感悅奮躍興起沛然若江河之注有莫之能禦者矣然竊嘗論之善者人心之所固有非自外至者也但為氣稟所拘物

欲所蔽始昧於其理而流於不善聖經賢傳所以教人
為善者其言固非一端然而人心有不能盡善以歸於
有極者誠由信道不篤視為空言而莫知所止故不若
備舉其人為善之迹獲福之實昭然可鑒者以曉之則
人易於從化樂於視效有不自知其入於至善之域斯
則聖天子製作之意而示民以保極之道者蓋如此於
乎是書所載皆賢士大夫力行為善之實施之於日用
常行者至為切要誠由菽粟布帛有不可一日而無者

苟能即其人以觀其所以為行即其行以觀其所以為
報則知善之當為而身家之被其光榮者由於此子孫
之享其福澤者由於此所以垂名後世與天地同其悠
久者亦由於此仰而師之則而象之儼乎神明在上而
知敬也珠玉在傍而知好也孜孜焉勉勉焉力行以求
造夫至善之域如此而不為君子不為善人者蓋寡矣
然則聖天子拳拳而致意於是編者非特有功於當時
實有功於萬世其父母斯民之心可謂至極而無以加

者矣臣忝職禁林親拜是書之賜不勝欣戴敬譔為頌
一篇以贊揚聖德之萬一謹拜手稽首以獻其詞曰聖
皇御天下養萬民漸之以義煦之以仁文治誕敷聲教
攸暨際地蟠穹靡不沾被刑政弗事德禮導之惟欲斯
民底於雍熙民有恒性善所固有本根既蕪化為稂莠
惟克脩治以復其初推以及人恒若有餘繇古迄今善
人世出施德布惠惟人是卹人雖弗知其善亦至獲報
於天若合符契欲求其人著於簡籍敝精極神莫究其

迹聖斷天啓蒐羅今古備列其人衆善畢舉稽厥世代
千載一時彙分類別一覽不遺皇文宣著聖謨洋洋昭
回雲漢金薤琳琅寵錫臣民家傳人誦殆猶有虞四方
風動刻偽還淳革薄從厚胥為忠良脫去汙陋大哉皇
心製作之盛於萬斯年我民有慶皇德遠被民心所歸
至善之域我民是依於穆聖皇德配天地臣作歌詩播
於萬世

玉筍山賦

鰲宮散兮彩雲鯨海飛兮黃塵銅山渺兮寂寞玉峯
美兮嶙峋占西江之上郡表南紀之孤青攬神秀於
磅礴通仙靈於杳冥割晨昏而軼雲雨薄光景而生
風霆登之者若廣寒八萬戶之玉宇望之者恍巫山
十二峯之翠屏予嘗攀蘿絕澗繫馬西風斷蒼崖之
秋骨舒一笑於竒逢攀危巢於栖鶻附垂翅於冥鴻
發孤嘯於崖端振萬籟於笙鏞但覩夫華蓋倚天芙
蓉削玉清霜利鏑劍揷秋寒初月脩眉黛橫空綠其

瑰偉萬狀而東連者非臨川諸山列於前者乎重灘
來遠千里如瀉煙消雨峽隱若垂虹雪立風濤疾如
走馬行祠候龍女之暮歸別路泣驪駒之晚駕其蜿
蜒百折而南委者非章貢之經流繞其下者乎西連
石霜百丈之竒北挹閭皂寶金之秀或寬而陂陀或
卑而培塿莫不瞻仰其先後羅列乎左右則諸山聳
處之尊真足以配南山不崩之壽也方將臨飛梁凌
絕頂窮玄微入溟淖抽石室之藏書校黃庭之內境

俄遇鴻濛先生虛無誕叟身佩蒼精手捫落斗或處
靜而寄嘿或談空而說有相與吐羅宿之奇胸騁懸
河之辨口候紫氣於青牛嘆浮雲於蒼狗誕叟起揖
於先生曰子亦通玄者也獨不聞清江玉筍之山乎
夫洞之天者三十有六而法樂固為第一地之福者
七十有二而郁木固為無匹蓋天作而地藏宜鬼沒而
神出今子以憑虛弔古之才拔俗出塵之質不遊於玄
都千樹之時而訪於昆明劫灰之日何其異哉僕固鄙

人請告山川風物之美宮室羽儀之麗悉耳目之所及
庶幾發吾子之蒙而祛吾子之蔽也在昔此山卓卓太
古究其根盤罔知幾許錫以太白雲臺之名雜以羣玉
秦望之所崑崙峩嶢險阻嵒巖嵒嵒岵岵岵岵嵒嵒
者如龍踞者如虎方者如屏圓者如筥斷者如帛續者
如組高者如立下者如俯呀者如吞突者如吐平者如
削起者如舞向者如關回者如顧千奇萬狀不可遽數
其上則小山叢桂漆園大椿松檜栢椅桐栗榛大餘

連抱深踞重坤夸條幡纚布葉鋪芬昂霄聳壑霧合雲
屯白日而蛟虬動微風而笙歌繁禽則出穴雛鵲銜書
神雀黃鵠白鵬金雞玄鶴旋日駕鸞鵠鵠鵠呈其吐
綬名之搥藥雲彩星馳風毛雲落或翔而集或俛而啄
是皆踰岷越嶂離瀛度弱不遠伊邇於焉茲托其下則
玉芝歲蕤瑶草綠縟葭若麝香荃蘭甘菊芎藭鶴化金
鈴翬粟抗紫莖揚清馥耀羣芳駭衆目披幽崖施中谷
煜煜猗猗青青郁郁獸則馴虎飛獮麝香鹿鹿或獻果

而攀蘿或賣杏而收穀或食乎野草或眠乎石竹餘則
五色之毛千里之足茂先所不能知爾雅所不及錄莫
不肥大蕃息絡繹馳逐以寢以叱不瘵不瘵水則三溪
八池七潭六源丹砂之井玉醴之泉服之可以永壽飲
之可以成仙瀟瀟瀉瀉澄澄涓涓光極曉鏡聲彈夜絃
練橫飢瀉支分蔓延決而為雨積而為淵溉田百頃衣
食之源然後觸穹石赴奔川東匯彭蠡同歸海門其中
則蛟龍龜貝鰕鯉鰭鱗比目之鮐縮項之鰻沙蛤海蚌

明珠出焉亦有羣飛屬玉並浴文鴛雙鳬乘鴈鳴翠舞
鵝蒼鱗秀羽舉一漏千莫不集於淺瀨浮於清漣啜嚼
乎菰蒲菁藻棲息乎菱芡藕蓮建宮室則度其隰原拔
斯柞楫爰命工垂乃程匠石巧者獻能勇者效力千夫
雲從萬斧雷擊鑿石而龍門空斬木而虎穴赤發嶺表
之瑰材集江南之佳植倏鬼設而神運不一朝而山積
於是寶圖呈於坤靈玉梁降乎天寵倣配極之玄都列
飛霞之畫棟翬翼宇而欲翔螭負楹而不動華棖引明

月於璇題藻稅綴浮雲於朱拱露闕角之蒼龍啄簷牙
之丹鳳表以承天大秀之崇侈以天德垂光之竦參錯
乎萬象之鱗次彷彿乎九重之星拱觀其重觀疊樓右
坪左城飛甍驚海色之搖紅鉛砌鏤琅玕之連白牕綺
疏而結錢帶金釭而銜璧聚天上之星辰隔人間之風
日周河漢之昭回順陰陽之闔闢宜上帝之高居近天
顏之咫尺至若黃道雨晴瑤階塵軟翠蕤下玄武之旌
魚鑰起寥陽之殿羽衣翻仙子之霓裳雉尾擁宮人之


綵扇耀孤鶴於金莖鳴八鸞於翠輦魚龍舞九奏於鈞
天鵷鷺肅羣真於旒冕濟濟乎山澤之癯昂昂乎珪璋
之彥降笙鶴於緱山來舄舄於葉縣無非講道德於元
文咒長生之秘典玄霜杵月白帶香殘丹氣成虹爐存
火煉進麟脯之新奇集龍根之宛轉冰桃鬪瓜棗之筵
銀甕錫葡萄之燕又何必慕弱水之二神此塵世之所
常羨也鍾其精英發為人傑其方平重厚故為人也沉
毅而富才峭直孤高故為人也磊落而多節遠而九仙

嵯爾之名近則八祖森乎其列故孔梅沈謝之羣流歷
秦漢唐宋而烜赫訪遺跡則魏氏之瑤臺何君之石竅
臺聳東華赤谷之奇谷隱彤霞丹陽之奧箱峰蔓草之
似袍墨池寒藤之學草劉通慕似錄於徒聞夏禹惜神
標之未造涪翁僅吟於彷彿叔夜敢侔於醉倒逮及累
朝舉由其道銀鈎賜金榜之鏤題寶篆降御爐於恩詔
信為古今之名山非遯世延年者莫能到也言未卒先
生乃訢然而笑曰子誠知管晏之齊人識昭宣之秦客

但誇夫山川之為美而不知河山之帶礪也觀宮室之
為盛而不知兩都之舊制也羨木石鳥獸之同羣而不
知斯人之為貴也慕辟穀延年之可尚而不知所惡有
甚於死者夫達人之大觀曾何足以芥蒂雖殺身以成
仁真不亡而日在且夫天人物我本同橐籥聚則成形
散歸寥廓高為星辰低為河嶽故箕尾墜而傳說亡尼
山禱而聖人作二伯生而崧嶽降其神靈三蘓出而眉
山為之蕭索相業應乎旁求王迹寓於筆削為藩翰於

西周著文章於東洛是皆保海內之安危兼天下之憂
樂豈效乎沒世無聞但忘情乎丘壑且子不聞蓬萊方
壺遠則遠矣而樓船之樂未返瀉池之壁已遺莖臺井
幹高則高矣而茂林之石馬無聲柏梁之金人有淚是
二君者今安在哉今欲與子窺九嶷登太行上會稽探
禹穴沂崑崙觀澌渤追太史之奇蹤續前人之遺烈挽
壯士之天河洗中原之戰血然後對禮樂於丹墀進與
圖於天闕則下視玉筍之山者何足比於一髮也哉誕

叟聞斯言也狼顧鼠拱莫知所措夕陽今在山碧雲今
欲暮余乃拾銅雀於殘烟分玉蟾於墜露倚桂樹之秋
香遂登高而作賦



金文靖集卷六